

multo magis optarem, vt aliquando meliorem de eo conceptum TIBI facere velles, quippe qui certissime non modo optimi est ingenii et animi candidissimi, sed et solidam scientiae, quam profitetur, cognitionem possidet.

(97)* Praenobilissimo Dno Professore a Linné

S. pl. d.

J. Zoëga.

Omni certe iure miratus sum, quod ad ultimas meas cum seminibus missas nullam abs TE acceperim responsionem. Iam vero multo magis miror, quod litteras vna cum seminibus missas accepisse TE neges, et fateor me nescire quid hac de re cogitandum. Mittebas mihi aliquot semina, vna cum Catalogo eorum, quae a me desiderabas, et plura semina postea mittere promittebas. Ego vero quaecunque e desideratis habui, et plura alia non desiderata mittebam, vna cum litteris et catalogo eorum, quae a TE iterum accipere optarem. Horum aduentum mihi annunciauit pater venerandus; at abs TE nec responsionem accepi, nec seminum desideratorum vnicum vidi, et nequidem eorum, quae mihi in priori epistola promiseras. Hinc iudices quaeso, an fas sit mirari necne?

De re botanica nil noui habeo, nisi quod Schreberus tam botanicam quam oeconomicam graminum descriptionem cum iconibus editurus sit.

Vale et faue. Dabam Hafniae d. XXVI. Iulii 1766.

Nobilissimo Dno Professore a Linné Iuniori.

(98)* Viro Clarissimo, Eruditissimo

Domino Professore a Linné

S. pl. d.

J. Zoëga.

Sunt iam tres menses, ex quo TVAS gratissimas vna cum Parentis venerandi litteris acceperim, ad quas tam sero